

2

MATERYALISMONG DIYALEKTIKO

PANGBUKAS

Materyalismong diyalektiko ang panan-awan sa kalibutan sang rebolusyonaryo nga proletaryado. Ini ang sandigan nga panan-awan kag paghangup sang proletaryado sa naturalisa, katilingban kag kinaalam sang tawo. Ginaathag sini sa sandigan kon paano pagatun-an kag pagabag-uhon sang proletaryado ang kalibutan kag katilingban. Materyalismong diyalektiko ang pundasyon sang Marxismo-Leninismo-Kaisipang Mao Zedong, ang ideolohiya sang proletaryado.

May duha ka tampok nga kinaiya ang materyalismong diyalektiko. Una, ang makasahi nga kinaiya sini: panan-awan sa kalibutan sang proletaryado ang materyalismong diyalektiko. Natukiban ini sang proletaryado kag hayagan nga nagaserbi sa paghimakas sini kag indi sang ano pa man nga sahi. Ikaduha, ang pagkapraktikal sini: ginatum-ukan sang materyalismong diyalektiko nga ang teorya nakasandig sa praktika, nagahalin sa praktika kag matilawan ang kahustuhan sa praktika.

Nagaserbi ang materyalismong diyalektiko sa aktibo nga pagbag-o sa kalibutan. Ginatun-an sang materyalismong diyalektiko ang kalibutan sa solo nga katuyuan nga muklat nga bag-uhon ini.

Dapat hakson kag sakdagon ang materyalismong diyalektiko agud husto nga mahangpan kag mapangabuhi ang mga basehan nga prinsipyo sang Marxismo-Leninismo-Kaisipang Mao Zedong kag rebolusyong Pilipino. Kinahanglan ini agud mangin matuod kag lubos nga rebolusyonaryo ang panindugan, panan-awan kag pamaagi sang pagtratar sa tanan nga halambalanon, kag epektibo nga mapatuman ang rebolusyonaryo nga linya kag polisiya sang Partido sa lain-lain nga kahimtangan, linya sang hilikuton kag sakop.

Ang materyalismong diyalektiko ang yabi sa pagremolde sa kaugalingon sang mga Komunista. Ang ara sa pinaka-ubod sang pagremolde sa ideolohiya amo ang pagpauswag sang lubos nga materyalista nga diyalektiko nga panan-awan kadungan sang pagpamatuk sa ideyalista kag metapisikal nga panan-awan. Gani aton mapatubo ang mga maayo nga kinaiya sang mga muklat kag militante nga hangaway sang proletaryado: mga tampad kag matuod-tuod nga Komunista.

Ang topiko sang pagtuon matunga sa tatlo ka bahin:

- 1)Ang Duha ka Panan-awan sa Kalibutan--nga nagaathag sa mga sandigan nga kinaiya sang materyalismong diyalektiko kag sandigan nga kinatuhay sini sa ideyalismo;
- 2)Teorya sang Kinaalam sang Materyalismong Diyalektiko--nga nagaathag kon paano nagakahuman kag nagauswag ang kinaalam sang tawo ; kag

3)Diyalektiko nga Pag-uswag sang mga Bagay--nga nagaathag sa mga basehan nga prinsipyo sang pagbag-o sang mga bagay.

A.ANG DUHA KA PANAN-AWAN SA KALIBUTAN

1.Ano ang duha ka panan-awan sa kalibutan ?

Ang duha ka daku kag nagabanggianay nga kampo sang mga panan-awan sa kalibutan sa subong amo ang ideyalismo kag materyalismong diyalektiko.

Ang pagkatunga nga ini nakabase sa magkabanggi nga panindugan sa duha ka pundamental nga halambalanon:

a)nahanungod sa relasyon sang kamuklatan sang tawo sa naturalisa, relasyon sang pagpamensar sa aktwal nga pagluntad sang mga bagay; kag,

b)nahanungod sa paghangup sa pagbag-o kag pag-uswag sang kalibutan.

a. Ideyalismo kag metapisika

Ang ideyalismo nagapanindugan nga nagapanguna kag mas desaysibo ang kamuklatan kag pagpamensar sangsa naturalisa. Nagapati ini nga ang pagpamensar kag kamuklatan sang tawo indi nakabase sa materyal nga kalibutan sa baylo nagakinaugalingon, nahamulag kag nagapangibabaw sa materyal nga kalibutan.

Nagapati ang ideyalismo nga ang mga bagay hubon lamang

sang mga igbalatyag ukon persepsyon sang tawo. Waay sang bagay nga mahimo nga magluntad nga guwa sa igbalatyag ukon kamuklatan, nga indi sa kamuklatan nagahalina kag indi diri nakasandig.

Paano nagluntad ang kalibutan sadto nga waay pa sang tawo, ukon waay pa sang kamuklatan sang tawo? Para mapaathag ini, ginapatihan sang ideyalismo nga ang bilog nga kalibutan mga lawas nga duta lamang sang isa ka "gamhanan nga ispiritu" nga nagapangibabaw kag nagapahulag sa mga bagay kag sa bilog nga kalibutan, isa ka "kamuklatan" nga mas masangkad sangsa kamuklatan sang tawo, kag nagaluntad nga bag-o pa magluntad ang tawo.

Ang pinakahayag nga mga halimbawa sang ideyalismo amo ang pagpaathag sang kalibutan kag mga hitabo sa kalibutan paagi sa mga lihi, mysteryo kag ispiritu, kag mga pagpati nga pangrelihiyon.

Ang metapisika kabahin sang ideyalista nga panan-awan sa kalibutan. Ini ang paghangup sang ideyalismo sa pagbag-o sang kalibutan.

Ang kalibutan ginakabig sang metapisika nga hubon sang mga bagay nga human na, wala nagabag-o kag magkahumulag. Kon may ginakilala man nga pagbag-o, ginapatihan nga ini pagbag-o lamang sa kadamuon, dagway ukon pusisyon sang mga bagay. Ang ano man nga pagbag-o simple lang nga ginaugat man sini sa mga kabangdanan sa guwa sang bagay. Ginatan-aw sini ang mga bagay sang magkahumulag kag waay sang relasyon sa isa kag isa.

Ginapangalaba sang metapisika ang nagaluntad nga mga bagay kag ideya. Waay ini sang konsepto sang kasaysayan kag pagbag-o. Ang solo nga makita amo ang subong . Ginapatihan nga ang nagaluntad nga mga bagay kag ideya waay sang kutod, waay sang ginsuguran kag waay sang katapusan. Kon nagaatubang sang

mga aktwal nga pagbag-o, ginakabig nga ini aksidente, natabuan lamang, ukon epekto sang mga pwersa nga pangguwa.

Halimbawa sang metapisika nga panan-awan ang hurubaton nga "Ang kabuhi sang tawo pareho sang kariton; kon kaisa ara sa idalum, kon kaisa ara sa ibabaw". Kag depende sa swerte ukon kapalaran kon ara sa idalum ukon ibabaw sang "kariton sang kabuhi" ang isa ka tawo.

Bilang mga kabahin sang isa ka ideyalista nga panan-awan sa kalibutan, ang ideyalismo kag metapisika magkapareho sa esensya. Pareho nila nga ginahamulag ang kamuklatan kag pagpamensar sa materyal nga kalibutan nga sa pagkamatuod waay sang untat nga nagabag-o kag nagahulag santo sa kaugalingon nga mga layi. Sa pag-analisa sa mga bagay kag halambalanon, kinaiya sang ideyalismo kag metapisika ang mga pinadapol nga haum-haum nga indi nabase sa mga matuod nga hitabo ukon ginatilawan sa praktika.

b. Materyalismong diyalektiko

Ang materyalismong diyalektiko nagapanindugan nga una ang naturalisa sa kamuklatan. Ginakabig sini nga ang pamensaron waay sang iban kundi ang materyal nga kalibutan nga ginasalaming sang utok sang tawo kag nasalhin sa dagway sang mga ideya o mga pamensaron. Nagapati ang materyalismong diyalektiko nga ang kamuklatan kag pagpamensar indi pwede nga ihamulag sa utok sang tawo, ang materyal nga bagay nga nagapamensar. Kon waay ang tawo nga may utok, indi mahimo nga mag-angkon sang kamuklatan ukon pamensaron. Kag ginatum-ukan sini nga ang unod sang utok ukon ginapamensar sang tawo mga laragway lamang sang mga bagay-bagay ukon mga hitabo sa palibot kag kaugalingon niya.

Gani sa pagtuon, waay sang pagpangduha-duha nga ginahangup sang materyalismong diyalektiko ang mga bagay kag ang naturalisa nga santo sa aktwal nga pagluntad sang mga ini kag wala ginasimbugan sang ano man nga waay basehan nga mga haum-haum ukon lihi. Ginapangita sini ang kamatuoran halin sa mga matuod nga hitabo. Ginatitlawan sini sa praktika ang kahustuhan sang mga pamensaron.

Ang diyalektika ang paghangup sang materyalismong diyalektiko sa pag-uswag sang kalibutan. Nagapanindugan ini nga ang kalibutan hubon sang mga bagay nga indi pa lubos nga nahuman, mga bagay nga waay untat nga nagabag-o kag naga-uswag. Ang mga bagay nga sa gulpe-nga-pagtan-aw indi-matay-og kag wala nagabag-o, subong man ang aton nga kinaalam sa ila, nagaagi sa waay untat nga pagtuhaw kag pagkadula. Ginatan-aw sini nga ang waay untat nga pagbag-o sang mga bagay bunga sang mga kontradiksiyon sa sulod. Samtang, ang kada bagay sa paghulag sini ginaapektuhan sang kag nagaapekto sa mga bagay sa palibot.

Nagapati ang materyalismong diyalektiko nga indi lamang sa isip kag pusisyon, indi lang sa pangguwa nga porma nagabag-o ang materyal nga kalibutan kag ang katilingban. Mas malahalón, nagabag-o ang esensya o basehan nga kinaiya sang mga ini. Nagapati man ini nga ang mga pagbag-o sa kalibutan kag katilingban pangunahon nga bunga sang mga pangsulod nga kabangdanan. Sekundaryo ang impluwensya kag angtanay diri sang mga pangguwa nga kabangdanan.

Lubos nga rebolusyonaryo ang materyalismong diyalektiko. Ginatudlo sini ang paghangup sa kalibutan suno sa materyal ukon aktwal nga pagluntad sang kalibutan. Ginatudlo sini ang pagka-mapag-analisa, disiplinado kag matinugahon agud tukibon ang mga layi nga nagatalana sa pagbag-o sang ano man nga bagay. Ginatudlo sini ang aktibo nga papel sang tawo sa paghangup sa esensya sang mga bagay, kag sa mga kabangdanan

kag pamaagi sang pagbag-o sang mga ini.

Ngaa kinahanglan nga magrebolusyon ang pumuluyo batuk sa imperyalismo, pyudalismo kag burukrata kapitalismo? Ngaa kinahanglan nga magrebolusyon ang proletaryado agud agawon ang gahum pangpulitika halin sa burgesya? Ginapakita sang diyalektiko materyalista nga pag-analisa ang basehan sang pagrebolusyon, ang pamaagi kag direksyon sang pagbag-o sa katilingban. Kabaliskaran ini sang ideyalismo kag metapisika nga nagabulag sa pamensaron sang tawo, ginapatalang siya sa banas sang kahilwayan, kag nagaserbi agud ipabilin ang paghari sang mga manughimulos kag mapiguson nga sahi.

Ginapaathag sang ideyalismo ang kaimulon kag kabudlayan sang masa nga anak-balhas paagi sa "kapalaran", "swerte", "tagna", "duna nga kinaiya sang tawo", kag iban pa, nga nagasulsol sang pagka-pasibo kag pagka-mainantuson sa mabudlay nga "kapalaran", kag magsalig na lamang sa isa ka bathala, manunubos ukon maayo-nga-kabubut-on sang mga manughimulos nga nagahari nga sahi.

Sa pihak nga bahin, gina-analisa sang materyalismong diyalektiko ang kongkreto nga kahimtangan kag kasaysayan sang masa kag katilingban, ang mga matuod-tuod nga relasyon sa ekonomiya, pulitika kag katilingban nga ginahalinan sang manggad kag gahum sang mga nagahari nga sahi kag sang kaimulon kag pagkapigos sang mga sahi nga ginahimuslan. Pinakamalahalon, wala ini nagauntat sa paghangup sa kahimtangan sang masa kag katilingban agud lamang mapasangkad ang kinaalam. Ginatun-an ang mga ini sa katuyuan nga pundamental nga bag-uhon ang nagaluntad nga mga relasyon nga mapanghimulos kag mapiguson kag hilwayon ang mga sahi nga anak-balhas. Dugang pa, ginatudlo sini nga dapat magsalig ang masa sa ila rebolusyonaryo nga kamuklatan, determinasyon,

paghiliusa kag ululupod nga paghimakas agud mabag-o ang ila nga kahimtangan kag ang katilingban.

Gamhanan nga armas sang sahi nga mamumugon ang materyalismong diyalektiko agud mahangpan ang naturalisa kag katilingban, kag aktibo nga bag-uhon ang mga ini para sa interes sang katawhan.

2)Diin nagahalin ang pagluntad sang duha ka magkabanggi nga panan-awan sa kalibutan ?

Ang pagluntad sang duha ka magkabanggi nga panan-awan sa kalibutan nagahalin sa kondisyon sang produksyon kag sa banggianay sang mga makasahi nga interes sa katilingban.

a. Kondisyon sang produksyon

Nakabase sa lebel sang pagsulong sang produksyon sa katilingban ang kabilugan nga lebel sang paghangup sang tawo sa naturalisa kag katilingban. Sa pagpasakop sa produksyon, nagaangkon ang tawo sang basehan nga angtanay sa naturalisa kag sa iya nga isig-ka-tawo. Diri pangunahon nga nagahalin ang kinaalam kag pag-uswag sang kinaalam sang tawo.

Antes ang subong nga moderno kag dalagkuan nga produksyon nga nagagamit sang moderno nga makinarya kag teknolohiya, ang produksyon sa katilingban pugtak-pugtak, gagmayan, nagagamit sang mga simple nga kasangkapan kag tuman nga nalimitahan sang mga dikta sang naturalisa. Ang atrasado nga pagpanguma, halimbawa, ginahimo sa pugtak-pugtak nga mga puna sang duta sang mga mangunguma kag pamilya nila. Ang mga kasangkapan simple pareho sang arado, binangon, suyod kag mga hayup pangtrabaho. Ang kaayo sang ani pangunahon nga ginadesisyunan sang duna nga katambok sang duta kag timplada sang klima.

Sa subong sini nga lebel sang produksyon kag teknolohiya, indi makatilingala nga mahuman kag mangibabaw ang panan-awan sa naturalisa kag katilingban bilang hubon sang mga bagay kag hitabo nga pugtak-pugtak, wala nagabag-o kag ginakontrol sang isa ka pangguwa nga gahum nga nakapangibabaw sa tanan. Ang paghulag sang kalibutan kag katilingban ginapareho sa paliwat-liwat nga pagbulos-bulos sang pagtanom kag pag-ani, sang pagbutlak sang adlaw sa sidlangan kag pagtunod sini sa nakatungdan, kag sang mga tion sang temporaryo nga kabuganaan kag kaimulon. Sa subong sini nga lebel sang produksyon ukon mas manubo pa, nagtuhaw kag nagdominar ang ideyalismo kag metapisika.

Sa pihak nga bahin, ang siyentipiko nga panan-awan sa kalibutan sang materyalismong diyalektiko nagtuhaw kag mahimo nga magtuhaw lamang sa kahimtangan sang moderno kag dalagkuan nga produksyon nga nagagamit sang mga moderno nga makinarya kag moderno nga teknolohiya. Ang moderno nga produksyon kag teknolohiya bunga na sang dugang nga pagsulong sang siyensya nga pangnaturalisa kag labi pa nga nagapasulong sini. Sa kahimtangan nga ini natun-an sang tawo ang paghibalo sa mga angkon nga layi sang naturalisa kag mga bagay. Nagamit ang kinaalam nga ini agud kontrolon ang naturalisa kag paserbihon ini sa tawo. Gani sa baylo nga kabigon nga ginapahulag sang isa ka diyos ang naturalisa, mahimo nga hangpon ang mga layi nga matuod nga nagapahulag sini. Sa pagsulong sang moderno nga siyensya kag teknolohiya, padayon nga nagatipon man ang tawo sang kinaalam nahanungod sa wala-kutod nga pagkatuhay sa esensya sang mga bagay. Dugang nga mahangpan ang pag-angtanay sang mga bagay sa lain-lain nga pamaagi kag ang ila waay untat nga pagbag-o.

Kag sa kahimtangan sang dalagkuan kag moderno nga

produksyon, nabuyagyag sang lubos kaathag pati ang angtanay sang lain-lain nga tawo kag hubon sang mga tawo sa isa kag isa. Ginpang-angut-angot sang produksyon kag tindahan ang lain-lain nga sanga sang industriya kag negosyo, ang industriya kag agrikultura, ang lain-lain nga sahi, saray kag sektor sang katilingban. Ang daan nga magkahamulag nga mga baryo nagkaangut-angot sa isa ka bilog nga sistema nga pungsudnon kag pangkatilingban kag bisan ang mga pungsod nagkaangot-angot sa isa ka bilog nga sistema pangkalibutan.

Gani ang materyalismong diyalektiko kapid sang pinakamauswagon nga pwersa sang produksyon sa kasaysayan sang katilingban sang tawo kag nagasanto sa labi nga pagsulong sini. Ini bunga sang pinakamauswagon nga kinaalam sang tawo nahanungod sa mga layi sang pagbag-o sang naturalisa kag katilingban kag armas para sa labi nga pagpauswag sang kinaalam nga ini. Bangud sini, ang materyalismong diyalektiko amo man ang pinakamauswag nga panan-awan sa kalibutan sa kasaysayan sang katawhan.

b. Banggianay sang mga sahi

Labi pa nga malahalon nga kabangdanan sang pagluntad sang duha ka panan-awan sa kalibutan ang banggianay sang mga makasahi nga interes sa katilingban.

Ang kasaysayan sang mga sibilisasyon sa linibo ka tuig kasaysayan sang banggianay sang mga sahi. Sa katilingban nga natunga sa mga sahi, kada tawo upod sa partikular nga sahi kag tanan nga klase sang pamensaron may marka sang isa ka sahi.

Kada sahi nagasakdag sang panan-awan sa kalibutan nga nagasanto sa pang-ekonomiya kag pangpulitika nga interes sini. Ini ang kabangdanan kon ngaa sa pihak sang pag-uswag sang produksyon, teknolohiya kag kinaalam sang tawo sa naturalisa

kag katilingban sa subong , ginsakdag gihapon sang burgesya kag iban pa nga sahi nga nagapanghimulos kag nagapamigos ang ideyalismo kag metapisika. Kag ini man ang pundamental nga kabangdanan kon ngaa solo nga ang proletaryado ang nakasuma sang tanan nga pag-uswag sang kinaalam sang tawo sa naturalisa kag katilingban paagi sa pagtuga sang materyalismong diyalektiko.

Ang burgesya kag iban pa nga sahi nga nagapanghimulos kag nagapamigos naga-umpisa sa pagpangapin sang ila nga interes batuk sa interes sang kadam-an. Para pangapinan ang ila nga makasahi nga interes, ginaupangan nila ang padayon nga pagsulong sang katilingban. Ang sahi nga proletaryo naman nagaumpisa sa paghilway sang bug-os nga katawhan sa makasahi nga pagpanghimulos kag pagpamigos. Ginapakig-away sini ang padayon nga pagsulong sang katilingban.

Sadto nga ang burgesya sa Europa rebolusyonaryo kag nagapakig-away pa batuk sa paghari sang sahi nga agalon nga mayduta, ginsakdag sini ang isa ka tipo sang materyalismo nga bangian, mekanikal kag indi lubos agud ibagsak ang ideyalismo kag relihiyon nga nagapangapin sa pyudalismo kag sakdagon ang siyensya nga kinahanglan sang moderno nga produksyon. Sa isa ka bahin, ginpahalog sang materyalismong mekanikal ang gapos sang relihiyon sa pamensaron sang tawo. Ginpapagsik sini ang siyensya nga pangnaturalisa kag ginkontra ang mga lihi. Ginhawanan sini ang dalan para sa pagbagsak sang pyudalismo.

Nagapati ang materyalismong mekanikal nga nagapanguna ang naturalisa kag mga materyal nga bagay sa pamensaron kag kamuklatan. Apang wala ini nagapati nga nagabag-o sa esensya ang mga bagay kag wala sini ginakilala ang ikasarang sang kamuklatan kag pamensaron sang tawo nga impluwensyahan kag bag-uhan ang materyal nga kalibutan. Sa pagtan-aw sini, ang

naturalisa nagahulag sa sulod sang makitid lamang nga ginatiyugan, amo na ina kag wala nagabag-o san-o pa man. Ginatan-aw sini ang mga bagay sa uniberso sang magkahamulag kag nagapundo.

Ang kasaysayan sang katilingban sa pagtan-aw sini indi mahangpan nga puno sang wala-rason kag kalakasan. May pagkilala ini sa mga sahi kag banggianay sang mga sahi apang bilang kabahin sang waay untat nga pagtiyog sang kalakasan nga waay sang kapuslanan kag makasulumpa sa punto de bista sang rason kag hustisya nga waay sang kutod. Waay patawad nga ginhusgaran kag ginsumpa sini ang lain-lain nga aspeto sang daan nga katilingban nga pyudal para sakdagon bilang katapusan sang kasaysayan ang kaharian sang rason nga waay sang kutod, hustisya nga waay sang kutod, kinamatarung nga waay sang kutod, pagka-alalangay base sa naturalisa kag indi madingot nga kinamatarung sang tawo kag kontrata sosyal nga waay sang iban kundi ang paraiso nga kapitalista sa imahinasyon sang burgesya.

Ginadikta sang siyentipiko nga kamatuoran ang padayon nga pagsulong sang katilingban. Sigun sa kamatuoran nga ini, indi mahimo nga matapos ang kasaysayan sa pagpangibabaw sang burgesya kag sistema nga kapitalista. Pat-ud ang pagsulong sini pakadto sa rebolusyon sang proletaryado kag pagdula sang mga sahi kag pagpanghimulos sang tawo sa tawo. Direkta nga kabanggi ini sang makasahi nga interes sang burgesya. Gani indi mahimo mangin lubos ang pagsakdag sang burgesya sa siyentipiko nga panan-awan.

Madugay na nga ang burgesya nagwarik halin sa waay patawad nga pag-atake pakadto sa piyong-mata nga pagpangapin sa nagaluntad nga areglo. Madugay naman nga nabuyagyag ang kaugalingon nga inhustisya, kawawad-on-sang-rason kag kagarukan sang matuod-tuod nga ginharian sang kapital sa ibabaw sang duta. Mas nangin talalupangdon ang reaksyonaryo

nga kinaiya sang burgesya pagkaligad nga lubos nga makadominar ini sa katilingban kag ilabi na sang nagbaskog, naglapnag kag nag-agom sang dalagku nga kadalag-an ang proletaryo nga rebolusyon. Sa subong, ginasakdag sang daku nga burgesya ang pinaka-reaksyonaryo nga tipo sang ideyalismo kag metapisika.

Ang panan-awan sa kalibutan sang Rebolusyong Pilipino sang 1896 kapareho sang materyalismong mekanikal sang rebolusyonaryo nga burgesya sa Europa sadtong ika-17 kag ika-18 siglo. Gintinguhaan sini nga hilwayon ang pamensaron sang mga Pilipino halin sa pagkagapos sa ideyalismo kag relihiyon nga ginpalapnag sang mga kolonyalista nga Espanyol. Apang kongkreto nga nabuyagyag ang pagkakitid kag limitasyon sang panan-awan nga ini sang matiplang, mapa-ampo kag malamon sang imperyalismong Estados Unidos ang pamunuan nga ilustrado.

Sa subong, ang hayag nga ideyalismo, metapisika, mga lihi kag relihiyon ginagamit sang imperyalismong US, daku nga burgesya nga komprador kag sahi nga agalon nga mayduta agud tabunan, hatagan-rason kag pangapinan ang sistema nga malakolonyal kag malapyudal. Ginagamit nila ang ideyalismo kag metapisika agud ikadena ang pamensaron sang pumuluyo sa mga katanhagaan, lihi, kag pagginawi-ulipon.

Ang sahi nga proletaryo anak sang moderno kag dalagkuan nga produksyon. Ang iban nga sahi nga ginahimuslan nagakadula samtang naga-abanse ang bag-o nga produksyon. Apang ang proletaryado labi nga nagadaku kag nagabakud samtang nagauswag ang moderno nga produksyon. Luwas pa, ang proletaryado gid lang ang sahi sa kasaysayan nga pwede mahilway paagi lamang sa paghilway sang bug-os nga katawhan halin sa makasahi nga pagpanghimulos kag pagpamigos. Gani lubos nga rebolusyonaryo ang panindugan sini sa pagbag-o sang katilingban. Gani ang proletaryado gid lang ang nakatuga kag malig-on nga nagasakdag

sa lubos nga siyentipiko kag lubos nga rebolusyonaryo nga panan-awan sa kalibutan sang materyalismong diyalektiko.

k. Pagtuga sang materyalismong diyalektiko

Si Karl Marx ang nagtuga sang materyalismong diyalektiko. Siya ang una nga dungganon nga manunudlo sang internasyunal nga kahublagan nga proletaryo. Isa siya ka dungganon nga pilosopo, ekonomista, istoryan kag rebolusyonaryo nga lider nga natawo sa Alemanya kag nabuhi umpisa 1818 tubtub 1883. Nangin malapit nga timbang niya si Frederick Engels, isa pa ka dungganon nga manunudlo nga Komunista nga natawo sa Alemanya kag nabuhi umpisa 1820 tubtob 1895. Ginhalad nila ang ila bilog nga kabuhi sa pagsulong sang kahublagan kag rebolusyong proletaryo.

Nagsugod nga magpasakup sa kahublagan nga proletaryo sanday Marx kag Engels sa tian nga nagakabuyagyag na sa pinakamauswagon nga pungsod sa Europa ang kagarukan sang kapitalismo kag nagasugod na ang lain-lain nga ispontanyo nga paghimakas sang mga mamumugon batuk sa kapitalismo. Kadungan sini, padayon nga nagalapnag ang demokratiko nga rebolusyon batuk sa pyudalismo sa iban nga pungsod sa Europa.

Ginsakdag nanday Marx kag Engels ang materyalismo bilang solo nga matuod-tuod nga rebolusyonaryo nga pilosopiya suno sa ginapakita sang kasaysayan. Apang luwas sini, labi nga ginpadalum, ginpauswag kag ginpamanggad nila ang materyalismo paagi sa paglakip diri sang pinakamataas nga pag-abanse sang pilosopiya nga Aleman, partikular ang teorya sang diyalektika nahanungod sa tayuyon nga paghulag, pagbag-o, transpormasyon kag pag-uswag base sa internal nga pag-uswag kag angtanay sang mga bagay. Gani, nasikway ang pagkabangian, pagkahapyaw kag pagkapundo sang daan nga materyalismo.

Dugang pa, ginkumpleto ni Marx ang materyalismo sa

pagpasangkad sang kinaalam sa naturalisa, sa paghibalo sa katilingban kag kasaysayan kag pagtuga sini sang materyalismong istoriko. Natuga nila ang isa ka lubos nga bag-o kag mauswag nga sistema sang pamensaron kag panan-awan sa kalibutan kag katilingban, ang materyalismong diyalektiko. Sa ubay sang materyalismong diyalektiko kag istoriko, napundar ang rebolusyonaryo nga kahublagan nga proletaryo nga ginaiwagan sang pinakamauswag kag husto nga panan-awan sa kalibutan kag nakabase sa pinakamalig-on nga siyentipiko nga pundasyon.

3)Ano ang dungganon nga kapuslanan sang materyalismong diyalektiko sa proletaryado kag sa Marxista-Leninista nga Partido?

Ang materyalismong diyalektiko gamhanan nga armas sa pagrebolusyon sang sahi nga proletaryo. Lubos nga nagasanto kag nagasakdag ini sa pagsulong sang paghimakas para sa makasahi nga interes sang proletaryado. Ginahilway sini ang pamensaron sang sahi nga proletaryo sa ano man nga paghatag-rason sa pagpanghimulos kag pagpamigos nga burges. Ginaubayan sini ang rebolusyonaryo nga pagtratar sang sahi nga proletaryo sa lain-lain nga halambalanon nga nasumalang samtang nagamartsa pakadto sa sosyalismo kag komunismo.

Muklat kag sampaton nga gingamit sang mga dungganon nga manunudlo nga komunista ang materyalismong diyalektiko agud analisahon kag lubaron sa rebolusyonaryo nga pamaagi ang mga palaligban sang rebolusyong proletaryado sa kada natungdan nila nga panahon.

Ginplastar nanday Marx kag Engels ang pundasyon sang ideolohiya nga proletaryo. Gintuga nila ang teorya sang

syentipiko nga sosyalismo kag ginpamunuan nila ang praktika sang rebolusyong proletaryo sa panahon antes magtuhaw ang imperyalismo.

Si Lenin ang nagtuga sang teorya kag nagpamuno sa praktika sang rebolusyong proletaryo kag diktadurya sang proletaryado sa panahon sang imperyalismo. Si Lenin ang dungganon nga lider kag tagapundar sang Partido Komunista sang Unyon Sobyet. Ginpamunuan niya ang sosyalista nga rebolusyon kag ang pagtukod sang una nga estado nga sosyalista nga nangin modelo kag inspirasyon sang proletaryado sa bug-os nga kalibutan. Pagkapatay niya, ginpangapinan ni Stalin ang Marxismo-Leninismo kag ginpamunuan ang konstruksyon sang gamhanan kag moderno nga sosyalista nga ekonomiya, katilingban kag estado nga Sobyet.

Gin-amot naman ni Mao Zedong ang teorya kag praktika sang pagpadayon sang rebolusyon sa idalum sang diktadurya sang proletaryado. Ginsuma niya ang inagihan sang proletaryado sa diktadurya sang proletaryado kag sosyalista nga rebolusyon kag konstruksyon, kag gin-athag kon paano pamatukan ang moderno nga rebisyunismo kag ang katalagman sang pagbalik sang kapitalismo sa isa ka sosyalista nga katilingban. Siya ang dungganon nga lider kag tagtukod sang Partido Komunista sang Tsina. Sa pagpamuno sa madinalag-on nga bag-o nga demokratiko nga rebolusyon sa Tsina, nakahatag man siya sang mga malahalón nga amot sa teorya kag praktika sang rebolusyon nga duha ka-halintang kag inaway banwa sa mga kolonya kag malakolonya.

Ang kahustuhan kag gahum sang materyalismong diyalektiko napamatud-an na sang rebolusyonaryo nga praktika sang proletaryado sa bug-os nga kalibutan sa kulang-kulang 150 ka tuig.

Agud mapamunuan ang rebolusyon tubtub sa kadalag-an, kinahanglan nga idapat sa kongkreto nga praktika sang

rebolusyon ang mga unibersal nga kamatuoran sang Marxismo-Leninismo-Kaisipang Mao Zedong. Yabi ang pagpakasampaton sang Marxista-Leninista nga partido sa paggamit sang materyalismong diyalektiko sa rebolusyonaryo nga praktika. Indi lubos nga mahangpan kag indi lubos nga magamit sa praktika ang mga ginatudlo sang mga dungganon nga manunudlo nga komunista kon indi paghangpon kag pagsakdagon ang ila panan-awan sa kalibutan.

Ang materyalismong diyalektiko epektibo nga armas sang Partido sa pagpamatuk sa mga impluwensya sang ideyalismo kag metapisika. Ang mga impluwensya sang ideyalismo kag metapisika sa sulod sang Partido nagabungsa sang paglihis sa tama nga banas, pagkagaruk, pagkahamulag sa masa kag pagkapaaslaw.

Dapat aktibo kag lubos nga pamatukan sang taga ka Komunista nga Pilipino ang ideyalismo kag metapisika kag armanan ang kaugalingon sang materyalismong diyalektiko. Sa pagremolde sang panan-awan sa kalibutan santo diri, ang kada isa mangin malig-on, aktibo kag tampad nga katapu sang Partido.

Ang materyalismong diyalektiko ang pinakatuburan sang ispiritu nga rebolusyonaryo, isganan, lubos kag disiplinado nga marka sang isa ka Marxista-Leninista nga Partido.

B. TEORYA SANG KINAALAM SANG MATERYALISMONG DIYALEKTIKO

1. Diin nagahalin ang mga husto nga ideya?

Ang mga husto nga ideya indi hulog sang langit kag indi duna sa utok sang tawo. Nagahalin ang mga husto nga ideya sa praktika nga pangkatilingban--ang pagpasakup sa paghimakas

para sa produksyon, banggianay sang mga sahi, kag syentipiko nga pag-eksperimento. Sa praktika nagahalin ang mga ideya kag sa praktika ginatilawan ang kahustuhan sang mga ini.

Sa pagpasakup sa paghimakas para sa produksyon, banggianay sang mga sahi kag siyentipiko nga pag-eksperimento, nagapartisipar ang tawo sa pagbag-o sa naturalisa kag katilingban. Nagatipon siya sang kinaalam nahanungod sa mga kinaiya kag mga layi sang paghulag sang naturalisa kag katilingban. Hamulag sa praktika nga ini, imposible nga makabalay sang husto nga ideya ang tawo, kag imposible nga mapamatud-an ang kahustuhan sang ano man nga ideya.

Halin sa inagihan nagabalay ang tawo sang mga ideya kag ginagamit niya ang mga ideya nga ini sa praktika. Sa panahon nga naagum sa praktika ang ginahandum nga resulta, napamatud-an nga bastante ang ideya kag padayon pa nga ginagamit ini sa praktika agud labi nga mapasangkad kag mapamanggad. Kon wala naagum sa praktika ang mga ginahandum ukon kabahin lamang sang ginahandum, mapamatud-an nga sala ang kabilugan ukon bahin sang ideya. Paga-islán ang bilog ukon bahin sang ideya nga sala kag ang bag-o nga ideya liwat nga pagatilawan sa praktika tubtub lubos nga magsanto sa praktika. Sa sini nga pamaagi, ginabilog ang mga husto nga ideya halin sa praktika nga pangkatilingban.

Gani sa aton nga pagtuon, kinahanglan nga manindugan kita para sa praktika. Sa pagpangita sang kamatuoran nga magaubay sa aton rebolusyonaryo nga praktika, hatagan sang pinakamataas nga importansya ang mga datos kag impormasyon halin sa matuod nga kabuhi kag kongkreto nga inagihan. Pamatukan ang pagpangalaba sa libro kag sakdagon ang aktibo kag madaluman nga pagpanayasad sang katilingban kag pagtuon sa mga kongkreto nga inagihan. Gamiton sa praktika ang kinaalam kag mga ideya kag uyatan ang mga ideya nga napamatud-an, paagi sa praktika, nga nagasanto sa kamatuoran. Ginatudlo sa aton

sang panindugan nga ini nga mangin maanting, mapangusisa, aktibo, mapainubuson kag tampad sa pagtuon.

Ang panindugan para sa praktika panindugan man para sa masa. Angkon sang masa ang matuod nga masangkad kag madalum nga inagihan sa katilingban kag mga bagay gani dapat mapainubuson nga makatuon sa inagihan kag ideya nila. Ang inagihan sang isa ka tawo dapat iangot sa mas manggaranon nga inagihan sang malapad nga masa. Ang mga dungganon nga manunudlo nga komunista mga modelo sa paghatag sang husto kag mapainubuson nga pagkonsiderar sa inagihan sang malapad nga masa sa mga dungganon nga kahublagan kag rebolusyon agud makabilog sang mga husto nga ideya kag teorya.

Sa pihak nga bahin, ang rebolusyonaryo nga praktika dapat ubayan sang teorya sang Marxismo-Leninismo-Kaisipang Mao Zedong. Ginatiglawas sini ang inagihan sang rebolusyonaryo nga proletaryado sa bug-os nga kalibutan sa kulang-kulang 150 ka tuig. Ang pag-angot sang rebolusyonaryo nga praktika sa rebolusyonaryo nga teorya amo ang pag-angot sang rebolusyonaryo nga praktika sa mas masangkad kag mas manggaranon nga rebolusyonaryo nga praktika.

2. Paano ang proseso sang pag-uswag sang kinaalam ?

May tatlo ka hut-ong ang proseso sang pag-uswag sang kinaalam: ang hut-ong sang kinaalam nga perseptwal, ang hut-ong sang kinaalam nga rasyunal, kag hut-ong sang pagbalik sang ideya sa praktika.

a) Hut-ong sang kinaalam nga perseptwal

Ang una nga hut-ong sa proseso sang paghibalo amo ang

pag-tipon sang mga obserbasyon, impresyon kag mga datos nga ginasalaming sang pamensaron paagi sa pagbatyag, pagtan-aw, pagpamati, pagsimhot kag pagpanabor. Ini ang hut-ong sang kinaalam nga igbalatyag ukon perseptwal.

Nagakatipon ang mga impormasyon nga ini sa pagpasakop sa praktika nga pangkatilingban. Nagapakig-angot ang tawo sa iya palibot, kag ang una nga makit-an kag mabatyagan niya amo ang hayag nga bahin sang mga hitabo, ang mga pugtak-pugtak nga aspeto, ang pangguwa nga relasyon sang mga bagay.

Ang kinaalam nga perseptwal ukon mga datos nga natipon sang pagtan-aw, pagpamati, pagsimhot, pagpanabor kag pagbatyag nagasalaming sa mga matuod nga hitabo kag kahimtangan. Apang ang mga ideya nga nagakahuman sa hut-ong nga ini lapta -lapta, bangian kag hapaw. Wala ginareplektar sang kinaalam nga perseptwal ang esensya sang mga bagay-bagay. Sa una nga hut-ong nga ini, wala pa makabilog sang mga konsepto nga labi nga madalum, ukon makadihon sang mga lohikal nga kongklusyon.

Halimbawa, ang mga pamatan-on nga aktibista nga naga-integrar sa masa sa prenteng gerilya sang BHB sa kaumhan. Sa mga una nga adlaw, makilala nila ang mga hangaway sang armado nga yunit pangpropaganda kag ang pila sa mga mangunguma kag ila pamilya, kag makaupod sila sa mga matag-adlaw nga hilikuton sang AYP pareho sang pagpanayasad kag hilikuton pangpropaganda sa kubay sang mga mangunguma kag sinapol sang mga organisasyong masa. Halin sa amo nga direkta nga inagihan, makabilog sila sang mga impresyon kag indi-kumpleto nga laragway sang kahimtangan sang masa kag sang hilikuton pangmasa sa lugar, subong man sang mga pamaagi sang paghulag sang hangaway sang banwa sa kaumhan. Sa hut-ong nga ini sang paghibalo, indi pa sila makabilog sang kumpleto nga laragway sang kahimtangan sang lugar kag sa hulu-halintang nga hilikuton pangmasa.

b) Hut-ong sang kinaalam nga rasyunal

Ang pagbilog sang ideya, pag-analisa, pagreyalisa ukon pagbalay sang teorya halin sa kinaalam nga perseptwal ang ikaduha nga hut-ong sang paghibalo. Ini ang hut-ong sang kinaalam nga rasyunal ukon makahangup.

Madamo nga beses nga nagasulit ang pagdamo kag pagsangkad sang kinaalam nga perseptwal sa padayon nga pagsapraktika sa katilingban. Halin diri, nagakahuman sa pamensaron sang tawo ang mga ideya nga nagapadalum sang paghangup niya sa tuyo sang praktika pangkatilingban.

Sa hut-ong nga ini, ginagamit sang tawo ang iya utok agud liwat nga ihilera kag itaud-taod, kag analisisahon ang lapta-lapta nga datos ukon impormasyon nga igbalatyag. Ginapain ang mga indi malahalón agud mapili ang mapuslanon, ginakuha ang mga paltik agud mapili ang matuod, sa pamaagi nga ginataud-taod ang mga datos, bagay kag hitabo kag nagapakadto halin sa guwa nagapasulod, agud matukiban ang esensya sang mga ini.

Gani duha ka bagay ang kinahanglan agud maagum ang paglumpat halin sa kinaalam nga perseptwal pakadto sa kinaalam nga rasyunal: Una, ang bastante nga kadamuon kag kamanggaranon (indi lang pugtak-pugtak) sang kongkreto nga datos ukon impormasyon (indi imahinasyon kag haum-haom lamang). Ikaduha, ang pagpamensar ukon pag-analisa kag pagbilog sang kongklusyon.

Ang pagbilog sang mga ideya, kongklusyon ukon prinsipyo halin sa mga datos nga nakalap sang igbalatyag mas mataas kag mas malahalón nga tikang sa paghibalo nahanungod sa mga bagay. Kag ang produkto sini, ang mga teorya, samtang abstrakto kag

nasalhin na sa porma sang mga ideya nagasalaming sa mga matuod nga hitabo sang mas madalum, mas matuod kag mas bilog. Gani ang mga inagihan kinahanglan nga mapasaka sa lebel sang teorya.

Natuhay ang kinaalam nga perseptwal sa kinaalam nga rasyunal bangud ang kinaalam nga perseptwal napatungod sa magkahamulag nga aspeto, sa hayag nga mga hitabo kag sa pangguwa nga mga relasyon sang mga bagay, samtang ang kinaalam nga rasyunal isa ka daku nga pagsulong agud mahakos ang kabilugan, ang esensya kag ang pangsulod nga relasyon sang mga bagay. Ginabuyagyag sini ang mga pangsulod nga kontradiksyon sang mga obhetibo nga bagay, ang ila mga layi kag ang pangsulod nga angtanay nila sa isa kag isa samtang waay-untat nga nagabag-o.

k) Hut-ong sang pagbalik sang teorya sa praktika

Wala nagatapos ang proseso sang pag-uswag sang kinaalam sa hut-ong sang kinaalam nga rasyunal. Sa hut-ong sang kinaalam nga perseptwal kag kinaalam nga rasyunal indi pa mapat-ud kon ang nabilog nga kongklusyon ukon teorya nagasanto sa reyalidad kag kongkreto nga kahimtangan. Kinahanglan nga tilawan ang kahustuhan sang teorya paagi sa praktika.

Ini ang ikatatlo nga hut-ong sang pag-uswag sang kinaalam: ang hut-ong sang pagbalik sang teorya sa praktika.

Sa hut-ong nga ini, ginagamit ang teorya agud ubayan ang praktika. Sa paggamit sang teorya bilang ubay sa paghulag, mapamatud-an ang kahustuhan sang teorya halin sa aktwal nga resulta sang paghulag. Subong man, labi pa nga mapauswag ang teorya. Matadlong ang mga kasaypanan sa kinaalam kag mga bahin sang teorya nga napamatud-an nga wala nagasanto sa realidad. Sa dugang pa nga praktika, nagatuhaw man ang bag-o nga mga

halambalanon kag kahimtangan nga nagakinahanglan sang panibag-o kag mas mauswag nga teorya.

Halimbawa, matapos matipon ang bastante nga datos, kag ma-analisa ang mga ini, mabilog ang mga panugod nga kongklusyon nga bastante agud makabalay sang plano. Kon mapatuman ang plano, matilawan ang kahustuhan sang mga kongklusyon, kon may bahin nga sala kag kon may mga halambalanon nga wala pa nahatagan sang natungdan nga igtalupangod.

Ang pagbalik sang teorya sa praktika ang pinakamalahalon kag pinaka-desaysibo nga tikang sa bilog nga proseso sang paghibalo. Ang solo nga katuyuan sang pagtuon naton sa kalibutan amo ang bag-uhon ini. Padayon lamang nga magauswag ang kinaalam kon padayon nga ginagamit, ginatilawan kag ginapauswag sa praktika ang mga ideya kag teorya.

d) Ang bilog nga proseso sang pag-uswag sang kinaalam

Tukibon ang kamatuoran sa praktika kag liwat paagi sa praktika, pamatud-an kag pauswagon ang kamatuoran. Magsugod sa kinaalam nga igbalatyag kag aktibo nga pataason ini sa kinaalam nga nakahangup; pagkatapos, magsugod sa kinaalam nga nakahangup kag aktibo nga ubayan ang rebolusyonaryo nga praktika agud bag-uhon pareho ang obhetibo nga kalibutan kag suhetibo nga kamuklatan sang tawo. Praktika, kinaalam, liwat nga praktika nga mas mauswag kag liwat nga kinaalam nga mas mauswag. Masulit ang dagway nga ini sa waay katapusan nga pagtiyog, sa diin ang kaundan sang praktika kag kinaalam naga-abanse sa mas mataas nga lebel sa kada pagtiyog.

Sa kabilugan dapat hangpon nga ang proseso nga ini indi

mahipid ukon tayuyon kundi puno sang pagtiyog kag pagliko, sang inanay nga pag-uswag kag mga gulpe nga paglumpat.

Ngaa subong sini? Kinahanglan anay nga matipon halin sa praktika ang datos nga bastante ang pagka-manggaran antes mabilog sa isa ka paglumpat ang husto nga ideya. Nalimitahan ini sang nagaluntad nga lebel sang teknolohiya. May mga limitasyon ang kinaalam kag inagihan sang mga tawo, kag may limitasyon man ang iya ikasarang sa pagtuon kag paghulag. Luwas pa diri, pwede nga malihis ang paglantaw kag pag-analisa sa mga bagay bangud sa mga impluwensya sang ideyalismo.

Apang sugod sa umpisa, kag sa kada hut-ong sang paghibalo, ang nagatalana sa kada pagsulong amo ang muklat kag aktibo nga papel sang tawo nga nagatuon sa kalibutan agud baguhon ini. Manggaranon na gid man ang kinaalam sang tawo. Natukiban na sini ang rebolusyonaryo nga teorya sang Marxismo-Leninismo-Kaisipang Mao Zedong. Napamatud-an na ang unibersal nga kamatuoran sang rebolusyonaryo nga teorya sa manggaranon nga inagihan sang rebolusyonaryo nga proletaryado kag pumuluyo sa bug-os nga kalibutan. May mga bag-o nga kahimtangan kag bag-o nga hangkat sa pagdapat sang rebolusyonaryo nga teorya nga ini sa kongkreto nga praktika sang pagsulong sang proletaryong rebolusyon. Ginatudlo sa aton sang inagihan, kag sang Marxista-Leninista-Maoista nga teorya sa pag-uswag sang kinaalam, nga padayon nga magauswag ang aton rebolusyonaryo nga praktika kon ginaubayan sang rebolusyonaryo nga teorya, kag padayon man nga magauswag ang rebolusyonaryo nga teorya sa lubos nga pagsulong kag pagsuma sang rebolusyonaryo nga praktika.

Sa aktwal nga kabuhi, kinaandan indi lubos nga blangko ang kinaalam kag inagihan nahanungod sa isa ka bagay. Kinaandan nga nagasugod kita nga may nauyatan nga kinaalam kag inagihan naton ukon sang iban. Gani samtang matuod nga ginapakamahahal naton ang direkta nga inagihan sa paghibalo

nahanungod sa mga bagay, kinahanglan nga muklat nga gamiton ang mga nauna nga kinaalam kag inagihan. Ang yabi sa bilog nga proseso sang pag-uswag sang kinaalam amo ang husto nga pag-angot sang teorya kag praktika sa kada hut-ong. Dugang pa, kinahanglan makatuon kita sa mga nagligad nga inagihan kag kinaalam kag sa inagihan kag kinaalam sang iban.

Ang kasaypanan sang empirisismo kag dogmatismo amo ang pagbulag sang teorya sa praktika. Ang kasaypanan sang empirisismo amo ang pag-untat sa mas manubo nga hut-ong sang perseptwal nga kinaalam; ginapamilit sang empirisismo nga solo nga ang kinaalam nga perseptwal lamang ang masaligan. Ginahikayan sini ang ubay sang teorya. Gani, wala nahangpan sang empirisismo ang esensya sang mga bagay. Ang kinaalam sini manabaw, bangian kag indi kumpleto. Ginapangindian sini nga i-angot ang praktika sa teorya, kag nagakakontento sa makitid nga inagihan sang isa ka tawo ukon gamay nga hubon. Bangud nagapangindi sa pag-ubay sang teorya, ang praktika padayon nga nagapangapakap sa dulom.

Ang kasaypanan naman sang dogmatismo amo ang pagpangindi nga idapat ang teorya sa kongkreto nga praktika, ang pagkakontento sa mga kinaalam-sa-libro nga wala ginahatagan sang kongkreto nga kaundan ang mga teorya base sa kongkreto nga kahimtangan kag inagihan. Ang teorya mga pangkabilugan nga kamatuoran nga nakuha halin sa inagihan. Makahatag ini sang pangkabilugan nga ubay apang indi sini mahimo mahakos ang tanan nga detalye kag pasikut-sikot sang mga kongkreto nga kahimtangan. Dugang pa, padayon nga nagasulong ang kalibutan kag katilingban. Padayon nga nagatuhaw ang mga bag-o nga halambalanon nga wala masakpan sang nasuma nga mga inagihan. Madulaan sang kapuslanan ang pagtuon sang teorya kon ini indi i-angot sa kongkreto nga praktika.

K.ESENSYA KAG LAYI SANG PAGHULAG SANG MGA BAGAY KAG PROSESO

1.Ngaa agud mahangpan ang isa ka bagay, ang basehan sang pagluntad kag ang pag-uswag sini, kinahanglan nga tun-an ang pangsulod nga kinaiya sini?

Ang pundamental nga basehan sang pagluntad kag pagbag-o sang bagay ara sa sulod, waay sa guwa. Ang basehan nga ini amo ang mga kontradiksyon sa sulod sang bagay.

Ang kontradiksyon amo ang magkabaliskad nga mga aspeto, pwera ukon tendensya nga dungan nga nagaluntad kag waay untat nga nagabanggi-anay sa sulod sang mga bagay. Ini ang pundamental nga kabangdanan sang pagluntad kag paghulag sang mga bagay. Ang angtanay kag inter-aksyon sini sa iban nga bagay sa palibot mga sekundaryo nga kabangdanan.

Agud mahibal-an ang kamatuoran nahanungod sa isa ka bagay ukon hitabo, dapat itumod ang pangunahon nga igtalupangod sa pagtukib sang kontradiksyon sa sulod kag magkuha sang mga layi sang pag-uswag paagi sa pagsunod sa paghulag kag angtanay sang magkabanggi nga mga aspeto. Kon ginasiling naton nga analisahon ang isa ka bagay, nagakahulugan nga tukibon ang kontradiksyon sa sulod kag tun-an ang paghulag kag angtanay sang kada aspeto agud mahibal-an ang sandigan nga kinaiya sang bagay kag matumod ang pamaagi sang paglubad sa kontradiksyon. Kon nahibal-an naton ini, mas aktibo kag epektibo kita nga makahulag agud bag-uhan ang mga bagay.

Sa katilingban, ang pangsulod nga mga kontradiksyon amo ang kontradiksyon sa tunga sang relasyon sa produksyon kag sang pwera sa produksyon, ang kontradiksyon sa tunga sang mga

sahi, kag ang kontradiksyon sa tunga sang daan kag bag-o. Ang pagsulong sang mga kontradiksyon nga ini ang nagatulod sa pag-uswag sang katilingban. Gani agud mahibal-an ang nagligad, subong nga kahimtangan kag pakadtuan sang katilingban dapat itumod ang pagtuon sa nasambit nga mga kontradiksyon. Ang pangunahon nga kabangdanan sang pagka-mainuswagon ukon pagka-atrasado sang katilingban, subong man sang pag-igrab sang mga rebolusyon sa katilingban, yara sa pangsulod nga mga kontradiksyon kag indi sa impluwensya sang mga pangguwa nga kabangdanan pareho sang ayuda ukon pagpasilabut sang mga dumuluong, heograpiya ukon klima.

Ang pag-uswag sang inaway pangunahon nga ginatalana sang angtanay, banggi-anay kag inter-aksyon sang pagsalakay kag pagpangapin, pagsulong kag pag-atras, kadalag-an kag kapaslawan. Gani sa pagtuon sang inaway dapat itumod ang pangunahon nga igtalupangod sa paghulag kag angtanay sang nasambit nga mga aspeto sang mga kontradiksyon kag ang mga sirkumstansya nga nagahatag-dalan sa pagpangibabaw sang ano man nga aspeto. Nagakalutos ukon nagadaog sa inaway ang isa ka armado nga hangaway pangunahon bangud sa pangsulod nga kahimtangan sini.

Ang kabuhi sang Partido pangunahon nga nakabase sa kontrahanay kag banggi-anay sang lain-lain nga klase sang mga ideya kag ang mga banggi-anay nga pang-ideolohiya agud malubad ang mga ini. Gani sa pagtuon sang kahimtangan sang Partido, dapat sentruhan sang igtalupangod ang kahimtangan sang banggi-anay sa tunga sang mga ideya sa lain-lain nga halambalanon. Agud mangin maayo sa pagtukod sang Partido, yabi ang husto nga pag-uyat sa mga banggi-anay nga pang-ideolohiya agud mapangibabaw ang proletaryo nga ideolohiya kag linya. Ang daan nga gintingub nga Partido napaslawan kag nalusaw bunga sang pagpangibabaw sang linya nga burges sang mga Lava kag Taruc sa

malawig nga panahon.

Samtang sekundaryo, malahalón man ang mga pangguwa nga paktor sa pagbag-o sang mga bagay. Para lubos nga mahangpan ang esensya sang isa ka bagay, indi lamang ang basehan nga kinaiya sini ang dapat hibal-on kundi pati ang mga relasyon sini sa mga bagay sa palibot. Samtang pundamental nga basehan sang pagbag-o ang pangsulod nga kontradiksyon, ang mga pangguwa nga paktor mga kahimtangan para sa pagbag-o. Buot silingon, ang angtanay kag kontra-aksyon sang bagay sa mga bagay sa palibot nagapadasig ukon nagapahinay sa pag-uswag sini. Dugang pa kinahanglan ang mga paborable nga pangguwa nga kahimtangan agud malubad ang pangsulod nga kontradiksyon.

Ang rebolusyong Pilipino ginapaboran sang madasig nga pagdalum sang krisis sang sistema nga malakolonyal kag malapyudal, malala nga krisis sang sistema nga kapitalista sa bug-os nga kalibutan, lubos nga pagkawasak sang moderno nga rebisyunismo, kag pagsulong sang paghimakas sang mga mamumugon kag pumuluyo sa bug-os nga kalibutan.

Ang mapagsik kag husto nga pagsulong sang hilikuton pang-ideolohiya sa sulod sang Partido paborable nga kahimtangan para sa mapagsik nga pag-uswag sang kada katapu sang Partido.

2. Ano ang buot silingon sang pagka-absoluto ukon pagka-unibersal sang kontradiksyon?

Ang buot silingon sini amo nga makit-an ang kontradiksyon sa tanan nga bagay kag sa tanan nga proseso sang pag-uswag sang mga bagay. Nagakahulugan man ini nga ang kontradiksyon nagalapos sa tanan nga proseso sang pag-uswag sang tagsa ka bagay halin sa umpisa tubtub sa katapusan.

Makit-an ang kontradiksyon sa tanan nga bagay sa

kalibutan, hasta sa naturalisa, sa katilingban ukon sa pamensaron sang tawo. Kon waay sang kontradiksyon waay ang tanan. Ang kontradiksyon ang kabangdanan sang pagluntad sang tanan nga bagay.

Ang kontradiksyon ang unibersal nga kabangdanan sang paghulag sang mga bagay kag makit-an sugod umpisa tubtub katapusan sa tanan nga proseso sang paghulag sang mga bagay. May kontradiksyon bisan waay sang hayag nga banggi-anay sa isa ka bagay. Ang simple nga pagkatuhay naga-unod na sang kontradiksyon kag ang pagkatuhay mismo isa ka kontradiksyon.

Bangud ang kontradiksyon absoluto ukon unibersal, ang kalibutan hubon sang mga bagay nga waay untat sa paghulag kag waay-untat nga naga-agi sa pagsublak kag pagkadula. Sigun sa prinsipyo nga ini, ginatun-an naton ang mga bagay sa ila wala-untat nga pagbag-o. Permi kita nagapanindugan para sa pagbag-o kag pagsulong. Lubos nga rebolusyonaryo ang aton panan-awan sa katilingban kag tanan nga bagay. Kag wala kita nagakatiplang sa mga temporaryo nga pag-untat ukon pagkalma sang gina-atubang nga mga kahimtangan.

3. Ano ang partikularidad sang kontradiksyon?

Nagatuhay sa esensya, kalidad kag kinaiya ang indi maisip nga bagay kag proseso. Bisin sa isa ka proseso, may mga hut-ong nga nagalain-lain sa kalidad kag kinaiya. Bunga ini sang partikularidad ukon pagka-relatibo sang kontradiksyon. Buot silingon, samtang ang tanan nga kontradiksyon may kinaiya nga magkapareho bilang mga kontradiksyon, ang tagsa ka kontradiksyon may kinaiya nga partikular sa iya. May pinasahi nga kinaiya ang mga aspeto sang kada partikular nga kontradiksyon. Kag may pinasahi nga kinaiya ang angtanay kag inter-aksyon sang mga aspeto sang kada kontradiksyon.

Ang pagsulong sang katilingban natuhay sa iban pa nga proseso bangud sa angkon nga partikular nga kinaiya sang kontradiksyon sa tunga sang relasyon sa produksyon kag pwersa sa produksyon, kag banggi-anay sang mga sahi. Ang inaway natuhay sa iban pa nga proseso suno sa partikularidad sang kontradiksyon sang pagsalakay kag pagpangapin sa armado nga banggianay. Kag sa kabuhi sang Partido, partikular nga kontradiksyon ang banggi-anay sang lain-lain nga klase sang mga ideya nga nagasalaming sa banggi-anay sang mga sahi kag sa tunga sang daan kag bag-o sa katilingban.

Ang isa ka malawig nga proseso indi lamang naga-angkon sang partikular nga kinaiya nga nagatuhay sang proseso nga ini sa iban pa. Ang kada hut-ong sini naga-angkon man sang kaugalingon nga partikular nga kinaiya nga tuhay sa iban pa nga hut-ong.

Samtang wala matapos ang isa ka malawig nga proseso, wala nagabag-o ang pundamental nga kontradiksyon kag ang esensya sang proseso nga gintalana sini. Apang sa lain-lain nga hut-ong nagalain-lain ang kasingki kag porma sang banggi-anay sang mga aspeto sang pundamental nga kontradiksyon kag may mga partikular nga kinaiya man ang angtanay sini sa iban nga mga kontradiksyon sa palibot. Nagaangkon man sang mga pagbag-o sa mga sekundaryo nga kontradiksyon pareho sang temporaryo ukon gamay nga pagkalubad sang pila, pagbahar ukon pagsingki sang pila, kag pagtuhaw sang mga bag-o.

Sa inaway banwa, halimbawa, samtang nagapadayon kag wala nagabag-o ang sentral nga katungdanan sa pag-agaw sang gahum pangpulitika tubtub sa lubos nga kadalag-an, kag ang mga hut-ong sang estratehikong depensiba, estratehikong pagkapatas kag estratehikong opensiba lunsay mga hut-ong sa sulod sang proseso nga ini, maga-angkon sa kada estratehiko nga hut-ong sang mga malahalon nga kinatuhay sa pusisyon kag ikasarang

sang hangaway sang banwa kag kontra-rebolusyonaryo nga hangaway; sa kalaparon, kadakuon kag kasingki sang mga inaway; sa lebel sang rebolusyong agraryo kag pagtukod sang mga base; sa kadakuon kag kusog sang Partido kag rebolusyonaryo nga kahublagan pangmasa; sa kasangkaron kag kalig-on sang pungsudnon nga nagahiliugyon nga prente; kag madamo nga iban pa.

Dugang pa, kinahanglan ang mga pat-ud nga kahimtangan agud dungan nga magluntad sa isa ka kabilugan ang magkabaliskad nga aspeto kag magluntad ang bagay ukon proseso nga kadungan sini. Kon wala ang kinahanglanon nga pat-ud nga kahimtangan, indi magaluntad ang nasambit nga kontradiksyon. Labi pa, kinahanglan man ang mga pat-ud nga kahimtangan agud malubad ang isa ka kontradiksyon kag indi malubad ang natungdan nga kontradiksyon kon wala ang kinahanglanon nga kahimtangan. Isa pa ini ka malahalon nga bahin kag manipestasyon sang partikularidad sang kontradiksyon.

Halimbawa, ang katilingban nga kapitalista kag ang kontradiksyon sang burgesya kag proletaryado nagtuhaw lamang sa isa ka pat-ud nga lebel sa pag-abanse sang produksyon kag sang katilingban sa kasaysayan. Ang solusyon sa kontradiksyon nga ini amo ang sosyalista nga rebolusyon nga matabo kag magadaog lamang sa mga pat-ud man nga kahimtangan.

Gani agud mahangpan ang kinatuhay sa esensya, kalidad kag kinaiya sang mga bagay kag proseso kag matumod ang nagakabagay nga solusyon sa mga partikular nga kontradiksyon, kinahanglan ang maid-id nga paghibalo sa mga partikular nga kinaiya sang kada kontradiksyon. Dapat likawan ang pagkasuhetibo kag arbitraryo sa pagtumod sa mga partikular nga kontradiksyon. Kinahanglan nga tukibon ang matuod kag kongkreto nga mga kontradiksyon, obserbahan ang mga ini sa

matuod nga kabuhi kag halin diri makakuha sang mga kongklusyon nahanungod sa esensya sang mga bagay.

Kinahanglan ang nagakaigo nga paghibalo sa matuod nga kabuhi kag mahipid nga pag-analisa sang mga detalye sang kinaiya sang mga bagay halin sa lain-lain nga anggulo kag sa lain-lain nga kahimtangan. Samtang nagapakamaayo kita diri labi nga nagauswag ang aton nga ikasarang kag mangin labi nga epektibo ang aton nga pagtuman sa mga rebolusyonaryo nga katungdanan. Sa pihak nga bahin, nagabunga sang kapaslawan ang indi pagtuon sa mga partikularidad sang kontradiksyon. Halimbawa, pat-ud nga mapaslawan ang rebolusyong Pilipino kon kopyahon lang ang mga prinsipyo kag inagihan sang mga madinalag-on nga rebolusyon sa iban nga pungsod nga waay sang pagkonsiderar sa mga partikularidad sang kahimtangan kag sirkumstansya sang Pilipinas.

Ang kontradiksyon sa kada bagay, ang kontradiksyon sa kada isa sa mga proseso sang pag-uswag sini, ang duha ka aspeto sang kontradiksyon sa kada proseso, ang kontradiksyon sa kada hut-ong sang isa ka proseso, kag ang duha ka aspeto sang kontradiksyon sa kada hut-ong, tanan sini may kaugalingon nga kinaiya, may partikularidad, kag kinahanglan nga nagakaigo nga sayasaton kag analisisahon agud mahangpan ang bagay kag proseso nga gina-analisa.

4. Ano ang relasyon sang unibersalidad kag partikularidad sang kontradiksyon?

Bangud labi nga masangkad ang nanari-sari nga kategorya sang mga bagay kag waay sang dulunan ang ila pagbag-o, ang isa nga unibersal sa isa ka konteksto kag lebel sang pagtuon mangin partikular sa iban nga konteksto. Sa pihak nga bahin naman, ang isa nga partikular sa isa ka konteksto kag lebel sang pagtuon mangin unibersal sa iban nga konteksto.

Ang solo nga unibersal kag absoluto nga kamatuoran sa tanan nga bagay kag tion amo ang pagka kontradiksiyon kag waay-untat nga pagbag-o sang tanan nga bagay. Bisan pa man, may mga kontradiksiyon kag kamatuoran nga unibersal kag absoluto sa mas manubo nga sakup sang hambalanon. Halimbawa, ang banggi-anay sang mga sahi relatibo sa bug-os nga kasaysayan sang katilingban sang tawo, buot silingon, nagaluntad ini sa isa ka pat-ud nga hut-ong lamang sang kasaysayan. May mga katilingban sa nagligad kag sa palaabuton nga waay sang mga sahi kag banggi-anay sang mga sahi gani indi napaidalum sa basehan nga mga layi sang banggi-anay sang mga sahi. Apang sa lain-lain nga katilingban sa kasaysayan nga may mga sahi kag banggi-anay sang mga sahi, ang kontradiksiyon sa tunga sang mga sahi kag ang basehan nga mga layi sini unibersal kag absoluto, buot silingon, nagaluntad kag nagalapos sa umpisa tubtub katapusan sang tanan nga proseso sang pag-uswag sang tagsa ka makasahi nga katilingban.

Dugang pa nga halimbawa, ang mga basehan nga teorya sang rebolusyong proletaryo relatibo kon ikumparar sa lain-lain nga nahauna nga rebolusyon sa malawig nga kasaysayan sang makasahi nga katilingban. Buot silingon, santo lamang ang mga ini sa rebolusyon batuk sa paghari sang burgesya kag samtang nagaluntad ang banggi-anay sa tunga sang proletaryado kag burgesya, kag indi sa mga nauna nga rebolusyon nga pareho sang rebolusyon nga burges kontra sa pyudalismo. Apang kon ikumparar sa mga rebolusyon nga ginapamunuan sang mga partido sang proletaryado sa lain-lain nga pungsod kag sa lain-lain nga hut-ong sang pagsulong sang pangkalibutanon nga rebolusyong proletaryo, unibersal ang mga basehan nga prinsipyo sang rebolusyong proletaryo. Buot silingon mahimo kag dapat gamiton nga ubay sa tanan nga rebolusyonaryo nga paghimakas sang proletaryado kag partido pangpulitika sini.

Sa pagtuon sang relasyon sang unibersalidad kag partikularidad sang kontradiksiyon, dapat hangpon nga ang unibersalidad kag partikularidad sang kontradiksiyon duna sa tanan nga bagay kag dungan nga nagaluntad sa mga kongkreto nga bagay. Ang unibersalidad makit-an sa kongkreto nga mga bagay kag nagaluntad nga kaangot kag kalakip sang partikularidad.

Gani agud mahangpan ang esensya nga komun ukon unibersal sang mga bagay ukon mga bagay sa isa ka kategorya, kinahanglan nga tun-an ang madamo nga partikular nga bagay kag kontradiksiyon. Halin sa pagtuon nga ini, makuha ang unibersalidad. Halimbawa agud mahangpan ang esensya nga malakolonyal kag malapyudal sang katilingban nga Pilipino, kinahanglan tun-an ang subong nga kahimtangan kag ang lain-lain nga hut-ong sang pag-uswag sini sa kasaysayan. Kinahanglan tun-an ang kahimtangan sang kada sahi kag ang angtanay sang kada isa sa patag sang ekonomiya, pulitika, kultura, militar kag sosyal sa lain-lain nga tion kag sa lain-lain nga bahin sang pungsod. Para mahangpan ang kahimtangan sang sahi nga mangunguma sa kabilugan, kinahanglan nga magtipon sang manggaranon nga datos halin sa pagpanayasad kag pagpanalawsaw sa kahimtangan sang mga baryo, lain-lain nga porma sang pagpanghimulos kag pagpamigos nga gina-agyan nila, angtanay nila sa lain-lain nga sahi sa lain-lain nga patag kag halambalanon, kag ang kasaysayan sang ila mga rebolusyonaryo nga paghimakas.

Sa pihak nga bahin, kon nahibal-an na ang komun nga esensya sang mga bagay ukon isa ka hubon sang mga bagay, magamit ang kinaalam nga ini agud labi nga masangkad, mapuslanon kag sistematiko nga tun-an ang iban pa nga partikular nga mga bagay. Halimbawa ang kinaalam naton sa mga basehan nga kinaiya sang katilingban nga Pilipino magamit naton nga ubay para sa padayon nga pangkatilingban nga pagpanayasad, pag-analisa sa mga kongkreto nga isyu nga nagatuhaw sa kada panahon, pagpadalum sang ihibalo sa

kahimtangan kag relasyon sang mga sahi, kag sa pag-atubang sa mga rebolusyonaryo nga katungdanan sa pagbag-o sini.

Bangud ang unibersalidad kag ang partikularidad dungan kag magka-angot nga nagaluntad sa mga kongkreto nga bagay, kinahanglan hatagan-igtalupangod pareho ang esensya nga unibersal kag partikular kag ang angtanay nila sa pagtuon sa kinaiya sang mga kongkreto nga bagay. Malahalón ang paghibalo sa partikularidad sang kontradiksyon agud matuhay ini sa iban nga kontradiksyon. Malahalón naman ang paghibalo sa unibersalidad sang kontradiksyon agud maangot ini sa iban nga kontradiksyon. Pareho nga kinahanglan ang duha kag matumod ang angtanay nila agud lubos nga mahangpan ang esensya sang mga bagay kag ang bilog nga kamatuoran nahanungod sa ila.

Halimbawa, sa pagtuon sang kahimtangan sa mga pabrika, may partikular nga kinaiya ang kahimtangan sang mga mamumugon, ang ila mga palaligban, ang lebel sang organisasyon kag kamuklatan nila, ang ila relasyon sa kapitalista. Sa pihak nga bahin naman kinahanglan nga maangot ang partikular nga kahimtangan nila sa kahimtangan sang bug-os nga sahi nga mamumugon, sang bug-os nga sahi nga burges, kag iban pa nga mga sahi sa katilingban sa lain-lain nga halambalanon nahanungod sa ekonomiya, pulitika, kag kultura. Sa sini nga pamaagi mahangpan ang kinaiya sang kahimtangan nga partikular sa ila kag kapareho sa iban nga pabrika kag bug-os nga katilingban. Dapat subong man sini ang pagtuon sa iban pa nga halambalanon. Sa pag-atubang sa mga katungdanan, kon hugot nga nahangpan ang partikularidad sang kontradiksyon, mahatagan sang nagakasanto nga tikang ang partikular nga kinaiya sang palaligban. Samtang kinahanglan nga i-angot ang pag-atubang sa mga partikular nga hilikuton sa mga pundamental nga hilikuton sang rebolusyon, sa amo sini magangkon sang husto nga rebolusyonaryo nga kinaiya kag perspektiba ang pag-atubang kag

pagtuman sa mga ini.

5. Ano ang kabilingan sang pagtuon sa indi alalangay nga pusisyon sang mga kontradiksyon sa paghangup sa kinaiya kag pag-uswag sang mga bagay kag proseso?

Sa kalibutan, waay sang bagay nga nagasulong sang pareho ka alalangay kag pareho ka bug-at. Sa pagkamatuod, mas natural kag mas kinaandan ang indi alalangay nga pag-uswag. Sa banggi-anay sang mga pwersa, tendensya ukon aspeto nga magkabaliskad, kinaandan nga indi alalangay ang pusisyon sang isa kag isa. Makita ang indi pagka-alalangay sa pusisyon kag hilikuton sang mga kontradiksyon sa lain-lain nga proseso kag hut-ong sang pag-uswag sang mga proseso kag sa relasyon sang mga aspeto sang kontradiksyon sa lain-lain nga kahimtangan.

Sa ano man nga proseso nga may kapin sa isa ka kontradiksyon, permi nga may prinsipal nga kontradiksyon nga sa iya pagluntad kag paghulag nagatungod sang desaysibo nga katungdanan ukon impluwensya sa pagluntad kag paghulag sang iban pa nga kontradiksyon. Kag sa kada hut-ong sang isa ka proseso permi man nga may isa ka prinsipal nga kontradiksyon nga nagatungod sang nagapanguna kag desaysibo nga hilikuton. Ang pagluntad kag paghulag sang prinsipal nga kontradiksyon sa bilog nga proseso kag kada hut-ong sang isa ka proseso desaysibo nga nagatalana sa kinaiya kag dalagan sang isa ka proseso kag sang kada hut-ong sang isa ka proseso.

Ang prinsipal nga kontradiksyon sa katilingban nga Pilipino subong amo ang kontradiksyon sa tunga sang reaksyunaryo nga alyansa sang imperyalismong US, daku nga burgesya komprador, kag sahi nga agalon nga mayduta sa isa ka bahin kag sang mga sahi nga mamumugon, mangunguma, petiburges kag pungsudnon nga burges sa pihak nga bahin. Ini ang

nagatalana sa sandigan nga kinaiya nga pungsudnon nga demokratiko sang subong nga rebolusyon sa Pilipinas.

Sa pag-atubang sa ano man nga palaligban ukon katungdanan, dapat hatagan sang espesyal nga pagtamud ang pagtumod sa prinsipal nga kontradiksyon. Basta nauyatan ini, mahapos nga malubad ang mga palaligban kag epektibo nga mapasulong ang mga hilikuton.

Sa ano man nga kontradiksyon, kinaandan nga indi alalangay ang pag-uswag sang duha ka aspeto. Ang mga tion nga daw alalangay ang pusisyon sang mga aspeto temporaryo lamang samtang sandigan ang tion nga indi sila magkaalalangay. Ang isa sa duha ka aspeto nagatungod sang nagapanguna nga papel kag ang isa sekundaryo. Ang pangunahon nga nagatalana sa kinaiya sang bagay amo ang prinsipal nga aspeto sang kontradiksyon, ang aspeto sang kontradiksyon nga nagapangibabaw ang pusisyon.

Apang wala nagapondo ang pusisyon nga ini. Nagabayluhanay sang pusisyon ang mga aspeto sang kontradiksyon, halin sa pusisyon nga sekundaryo nagahimo nga prinsipal ang isa kag halin naman sa pusisyon nga prinsipal nagahimo nga sekundaryo ang pihak. Ang pagbag-o sang pusisyon sang mga aspeto ginatalana sang pagluya ukon pagbaskog sang kada isa samtang naga-uswag ang bagay. Sa pagbag-o sang pusisyon sang mga aspeto, nagabag-o man ang kinaiya sang bagay. Ini ang proseso sang "pagpangibabaw sang bag-o sa daan" nga nagakatabo santo sa pangsulod nga esensya kag pangguwa nga kahimtangan sang bagay. Ang pagpangibabaw sang bag-o sa daan isa ka waay-kutod kag indi mawarik nga layi sang kalibutan.

Bangud nagapangibabaw sa bug-os nga katilingban nga Pilipino ang imperyalismong US, pyudalismo kag burukrata

kapitalismo, malakolonyal kag malapyudal ang kinaiya sang katilingban. Apang sa mga bahin sang kaumhan nga nagasulong ang inaway banwa, amat-amat nga nagapangingibabaw ang pwersa sang pumuluyo kag amat-amat man nga nagabag-o ang kinaiya sang katilingban sa mga ini. Kon makapangingibabaw na ang pwersa sang pumuluyo sa bug-os nga pungsod magabag-o na ang kinaiya sang katilingban nga Pilipino sa kabilugan.

Paagi sa paghakos sa prinsipal nga kontradiksyon kag prinsipal nga aspeto sang kontradiksyon, labi nga mahangpan ang kongkreto nga kinaiya sang mga bagay kag proseso kag husto nga matumod ang kalubaran sang mga palaligban ukon indi gani aktibo nga masulong pakadto sa mas mataas nga hut-ong ang isa ka proseso.

6.Paano nagakalubad ang isa ka kontradiksyon, nagakatapos ang isa ka daan nga proseso kag nagatuhaw ang bag-o nga proseso?

May umpisa kag katapusan ang tanan nga proseso. Pagkalubad sang kontradiksyon nga nagatalana sang pagluntad sang isa ka proseso, nagatapos man ang proseso nga ini kag nagatuhaw ang bag-o nga kontradiksyon kag bag-o nga proseso.

Sa pagsulong sang isa ka bagay ukon proseso, naga-agi ini sa duha ka lebel sang paghulag, ang lebel nga sa gulpe nga paglantaw matawhay ukon lebel nga relatibo nga pondo kag ang lebel sang hayag nga pagbag-o. Kon ara sa una nga lebel sang paghulag ang bagay, ara sa pusisyon ini sang kantitatibo nga pagbag-o. Amat-amat nga nagasingki ang banggi-anay kag amat-amat nga nagabag-o ang pusisyon sang kada aspeto. Nagabaskog ang bag-o kag nagalugdang ang pusisyon sang daan. Indi pa ini ang hut-ong sang pagbag-o sa kalidad sang bagay, gani sa hinali nga paglantaw, ang bagay pondo sa lebel nga ini.

Kon maglab-ot sa putuk-putukan ang pagbag-o nga

kantitatibo ukon maglab-ot sa isa ka pat-ud nga kasingkion ang banggi-anay sang mga aspeto sang kontradiksyon, magasulod naman ang lebel sang hayag nga pagbag-o ukon pagbag-o sa kalidad. Sa lebel nga ini nagakaguba ang kombinasyon sang magkabaliskad nga aspeto kag nagakadula ang bagay nga kadungan sini ukon nagatapos ang proseso nga kadungan sini, kag nagatuhaw ang bag-o nga kontradiksyon, bag-o nga bagay ukon bag-o nga proseso.

Nagakatabo ang pagkawasak sang kombinasyon sang magkabaliskad nga aspeto ukon ang lubos nga transpormasyon sa pamaagi nga ang daan nga aspeto ginalamon ukon ginakuhaan sang kondisyon agud makaluntad. Nagatransporma ang mga aspeto sa ila kabaliskad kag nagatuhaw ang lubos nga bag-o nga kontradiksyon.

Halimbawa, sa subong nga demokratiko nga rebolusyon sang banwa, nagapakigsumpong ang ginahimuslan kag ginapigos nga pumuluyo sa idalum sang pagpamuno sang Partido agud matransporma ang malakolonyal kag malapyudal nga katilingban sa isa ka hilway, demokratiko, mauswagon nga katilingban. Ginalubad sini ang kontradiksyon sa tunga sang imperyalismong US, pyudalismo kag burukrata kapitalismo kag sang pumuluyo nga Pilipino. Hulu-halintang nga ginapukan ang gahum pangpulitika sang nagahari nga sahi kag ginapabakud ang rebolusyonaryo nga gahum sang banwa. Sa pagdaog sang rebolusyon, matransporma ang mga nagahari nga sahi pakadto sa ginaharian kag ang daan nga ginaharian nga mga sahi matransporma sa nagahari. Sa pagdaog sang demokratiko nga rebolusyon sang banwa, ang mangin prinsipal nga kontradiksyon sa katilingban amo ang sa tunga sang burgesya kag proletaryado kag pagasuguran naman ang sosyalista nga rebolusyon agud malubad ini kag padayon nga mapasulong ang katilingban nga Pilipino.

Ang problema sa duta sa kaumhan nakabase sa banggi-anay sang monopolyo sa duta sang sahi nga agalon nga mayduta kag kawsa sang masa nga mangunguma nga makapanag-iya sang kaugalingon nga duta. Rebolusyong agraryo ang kalubaran sini, ang agalon nga mayduta nga may monopolyo sa duta matransporma pakadto sa kawawad-an sang duta ukon kawawad-an sang monopolyo sa duta kag ang masa nga mangunguma nga sadto nawad-an ukon wala sang duta maga-angkon sang duta. Ini ang pangunahon nga kaundan sang bag-o nga tipo nga demokratiko nga rebolusyon sa Pilipinas.

Matapos ang bag-o nga tipo nga demokratiko nga rebolusyon nga ginapamunuan sang proletaryado, ang pangunahon nga halambalanon naman sa kaumhan amo ang banggianay sa tunga sang modernisasyon sang agrikultura kag sang gagmay kag pugtak-pugtak nga produksyon nga nagasablag sa nahauna. Ang solusyon amo ang hulu-halintang nga kooperasyon kag kolektibisasyon sang pagpanag-iya sang duta kag kagamitan sa pagpanguma agud modernisahon ang agrikultura kag mahaw-as halin sa pag-antos ang masa nga mangunguma.

Malahalon nga bahin sang paghangup sa paglubad sa kontradiksyon ang paghangup sa lain-lain nga porma sang banggi-anay sang magkabanggi nga mga aspeto. Bangud lain-lain ang kinaiya sang mga kontradiksyon, lain-lain man ang porma sang banggi-anay sang mga aspeto kag lain-lain man ang kalubaran.

Ang mga basehan nga porma sang banggi-anay sang mga aspeto sang kontradiksyon amo ang antagonistiko kag indi antagonistiko. May nagabanggi-anay sa porma sang hayag nga inaway kag may nagabanggianay sa porma nga matawhay kag malinong. Ang mga antagonistiko nga kontradiksyon malubad sa pamaagi nga antagonistiko ukon makahas samtang ang indi antagonistiko nga kontradiksyon pwede nga malubad sa pamaagi nga mataywhay. Kag, sa idalum sang pila ka pat-ud nga

kahimtangan, ang antagonistiko nga kontradiksiyon mahimo mangin indi-antagonistiko kag ang indi-antagonistiko naman pwede mangin antagonistiko. Kaangot sini, nagakinahanglan sang kongkreto nga pagtuon sa mga sirkumstansya sang kada pat-ud nga banggi-anay kag indi dapat mekanikal nga magpilit sang mga dekahon nga solusyon.

Sa esensya, ang banggi-anay sa tunga sang nagapanghimulos nga sahi kag ginahimuslan nga sahi antagonistiko gani rebolusyon ang solusyon diri. Apang may tion man nga indi antagonistiko ang banggianay sang mga sahi, pareho halimbawa sa tion nga indi pa luto para sa rebolusyon ang isa ka makasahi nga katilingban. Matapos ang demokratiko nga rebolusyon sang banwa kag sa kahimtangan nga ara sa pagpamuno sang proletaryado ang estado sang banwa, ang antagonistiko nga kontradiksiyon sa tunga sang proletaryado kag pungsudnon nga burgesya mahimo matransporma sa indi antagonistiko nga kontradiksiyon kag malubad sa matawhay nga pamaagi. Ang banggi-anay sang mga ideya sa sulod sang Partido indi antagonistiko sa sandigan. Apang may mga banggi-anay man sang mga ideya sa sulod sang Partido nga mangin antagonistiko kon magkadto ini sa pagtukod sang anti-Partido nga mga paksyon nga nagapanabotahe sa rebolusyon.

MGA TALAMDAN:

1. Mao Zedong, "*Nahanungod sa Praktika*", MGA PINILI NGA SINULATAN, Libro I
2. Mao Zedong, "*Nahanungod sa Kontradiksiyon*", MGA PINILI NGA SINULATAN, Libro I

3. V.I. Lenin, "*Karl Marx*"